

Yuda

Yudaŋe yu kulemgoep.

¹Galalupne, nâ Yuda Yesu Kristogât hoŋ bawa akto Yakobogât emiŋe nâ yengât kulem esenŋe ire kulemgoân. Ye âmâ Ewenenŋe Anutuŋe okot âlep akyengim potatmâ oloŋyekmâ Yesu Kristogât akmâ damunyeŋe akmâ âgâmbô âlepŋân manmai. ²Yengât ulilaŋdere Anutuŋe okot âlep dondâ akyengim damunyeŋe akto biwiyeŋe sândugem âgâwiâp.

Mitigât gasa yâk yengât keiŋe.

³Galalupŋe, Yesuŋe heŋgem nenguepgât keiŋe kulemgowerângât nâŋgare humo aktâp. Gârâmâ umatŋe siâ hinŋe miawakyengimbo aregât Yesu Kristogât keiŋe nâŋgâm biwinenŋe yâkgâlân katenŋe kilep aregât pat amâ emelâk miawaknengiep are nâŋganmâ âmâ nâŋgâ nâŋgâyeŋe yeukŋe akbopgât yu kulemgoân. ⁴Luâk bikŋande nâŋgâ nâŋgâyeŋe yeukŋe agâkgât yoŋâk yengâlân togom mali. Luâk are amâ Anutuŋe ulikŋân makto hâuŋe bâleŋe miawakyengiwiapgât siâŋe kulemgoep yengât hâuyeŋe amâ yâk yengâlân miawakbiap. Akto yâk hin akmai. Anutugât bo hamep akmai. Akto Anutuŋe hanâk tân nengumap aregât nâŋgâm gulip akmâ hanâk hanâk mandenŋe âlepŋe Anutuŋe dosanenŋe kutigitnengiwiap dâm bâleŋe olowâk manmai. Akto areâk bo. Humo kautnenŋe konok Yesu Kristo yâk are hâkokomai. Akto Yesu âmâ hânân gâtŋerâm luâk yânŋe dâm nâŋgâmbiâ gemap. Luâk hain akmai are âmâ hâuŋe bâleŋe miawakyengiwiap.

⁵Galalupŋe, hâuŋe aregât keiŋe makbe. Den imâ emelâk nâŋgâm meteyi areâk makyengim nâŋgâyeŋgiwe. Ulikŋân Humo Anutuŋe amâ Israe luâk âmbâle kâmot humo Aigita hânânba kewuguyekto umatŋe hepunmâ ariyi. Akto are hamiŋân are yengâlân gâtŋe bikŋande Anutugât nâŋgâmbiâ giep are Anutuŋe hâuŋe bâleŋe kakyeŋân kato hilip aguyi. ⁶Akto areâk bo. Aŋelo bâleŋe arekŋe damun âiyeŋe gagaim panmâ welamyenŋe hepuli yâk âmâ Anutuŋe hâmbâi sop humoân hâuŋe bâleŋe akyengiwiapgât lope kârikŋe aregât kâlegen katyekto hândâkŋe katip yenguep. ⁷Akto siâ hin. Kepia lâuwâ Sodom akto Gomora akto kepia

ginje ginje tatmâ ariep aregât ambolupņande hanâk hanâk manmini. Hain akmâ luâk âmbâle egâlianġât dâp gulip bâleņe dondâ akmâ keiņe aņġâ dondâ mem miawakbiâ Anutugât luâk âmbâle nenņe ire ekmâ hamep akbaen dâm kâlâp pando om meteyegep. Amâ siân bikņande kâlâp kârikņân manmâ âġâwai yâkņe nâņġâm heņġemgowaiġât.

⁸Akto hâuņe bâleņe yu maktân imâ hainâk luâk hinņe yonġâk yengâlân togom hutyeņân miawagi areyengâlân miawakbiap. Luâk ire yâkņe gai hainâk hianġi den areġât ukenņe nâņġâm dâp gulip manmâ Anutu akto damunlupyene yeņæt hâkân akmâ aņelogât nâņġâmbiâ gemap. ⁹Dâ aņelo yengât humoyeņe kotņe Mikae yâkņe Mose moep areġât hâkņæt Niambi olop makmâ papalakmâ mendo gembo âġâmbo akmâ are kuk den bo maganep. Bo. Yâk ikiņæt nâņġâmbo bo âġæpegât den yân hinâk maganep, “Humoņe hâuņe bâleņe ġiņbiâp.” dâmbo areġât nâņġâmbo hâungoep. ¹⁰Dâ luâk irekņe âmâ wan me wan pâpkomai areġât makbiâ gemap. Akto nâņġâ nâņġâyeņe bo watmâ âmâ hâġġâlâk nâņġâm bau dua hinare akmâ egâlianġiâ ain âmâ hâuņe bâleņe miawakto hilip agumai.

¹¹Woe, yâk arekņe âmâ manmâ wan akmai? Amâ Kaiņe emiņe kondo moep yâġġât dâp watmai. Akto puli me sikumġât ukenņe akmâ luâk kotņe Bileamņe puli egâlianepġât Anutu hepulep hain akmai. Akto luâk kotņe Kora yâkņe Moseņe damunyeņe akminep yâġġât hâkân akmâ âġâ âġâņæt hilip aguep hainâk âġâ âġâņe yeņæt hilip agumai. ¹²Galama, luâk are âmâ yeņæt okot nâņġâ aņġim mendugum kinmâ sot om nemiân âmâ hutyeņân kinmâ aņun bâlâk sot soņġo areġâlâk nâņġâmai. Amâ areġât dop wanân katmâ maktere nâņġâwerâi? Hin. Damunlupyene âmâ yeņæt tepyeņaelâk nâņġâmai. Tânâk bo togombo hamandatņe yân dâġâm yemap. Akto seruņe togom âmâ waitmâ pando bo akto tânâk bo gemap. ġârâmâ luâk ire âmâ dop hain yâkņe bo tân nengumai. Akto dop siâ hin. Lâwin yânņe tuņe bo kândârâņe momoņe akto pâit pâitņe bunņe sopņân âmâ bo yemap dop hainâk luâk irekņe akmai. ¹³Akto seruņe haru waitmâ pando bam guto barak barak akmap, dop hainâk luâk irekņe bam gutmâ den dondâ makbiâ agak meme bâleņe miawakto ektenņe gemap. Yâkņe bâleņe aņunņe olowâk pagaleņe bo diâ bokmâ gulip agu agu akmai dop hainâk akmai. Akto Anutuņe hândâk welamņe humo yengât makmâ hârembo yem âġâwiap are âmâ luâk hainare yengât pat.

Enokoņe hâuņe membaigât keiņe magep.

¹⁴Akto luâk ire Enokoņe ulikņân yâk yengât keiyeņe makmâ miawagep. Enoko amâ Adamġât hamiņân miawakmâ gambiâ gambiâ kâmot 7 akto Enoko miawakmâ hin dâep, “Siân Humo akto aņelo âlepņe kâmot hamepņe olowâk miawakbai. ¹⁵Arekņe gem âmâ luâk bâleņe yâk bâleņe yeņæt keiņe mem miawakbiap. Akto Anutu bâlâk manmâ agak meme bâleņe akto den bâleņe Anutu mem ge katberâm makmai are

hainâk mem miawakyeabiap, aregât hâuŋe yeŋgiwiap.” dâep. Enokone hain dâep ina luâk hainare miawaktâi. ¹⁶ Miawakmâ galagât hogo hogo luâk akto siâ siâ hârokgât kambiam bâle akmai. Akto ukenyeŋe bâleŋe watmâ den agat agatŋe makmai me luâk puli me sikungât makmâ lau keluâk ulit agak hain are manmai. Luâk hainare manbiâ Anutuŋe makto hâuŋe bâleŋe emelâk kulemgôan are yeŋgâlân miawakbiap. Hain.

Tân agum kârikŋe manbaengât den.

¹⁷Galalupne, Humonenŋe Yesu Kristo yâkgât Aposololupŋande makyenŋiyi aregât nâŋgâmâk manbei. ¹⁸Hin magi, “Sop tâlâgumbo luâk bâleŋe miawakmâ ukenyeŋe bâleŋe watmâ Anutu mem ge katberâm makbai.” dâyi. Aregât nâŋgâmâk manbei. ¹⁹Luâk hain arekŋe Anutugât Heakŋe bâlâk manmâ hângâlâk nâŋgâm âmâ Yesugât kâmot potatyekberâm âi humo membiâ potatmai. ²⁰Galalupne, yeŋe âmâ den pat âlepŋe kulemgoyi are oyaŋbiâ âmâ nâŋgâ nâŋgâyene bunŋe kârikŋe akto biwiyene Yesugâlân kârikŋeâk kinbiapgât tân agum kârigem manbei. Akto Anutu ulilaŋberâm âmâ Heak kârikŋande tân nenguâk dâm ulilaŋmâ manbei. ²¹Hain akmâ Anutuŋe okot âlep yeŋgimap aregât nâŋgâm manbei. Akto Humonenŋe Yesu Kristone okot dondâ nâŋgâ nengimap aregâlâk nâŋgâm lâmgom manbei. Hain akbiâ manman kârikŋe yeŋgiwiâp.

²²Akto yeŋaelâk bo nâŋgâwei. Luâk âmbâle Anutugât akmâ han lâuwâ akmai are nâŋgâ nâŋgâyene kârikŋe agâkgât olop den maganŋi goanŋi akmâ yaiwâk yaiyenguwei. ²³Akto bikŋe kâlâpŋe oyekbopgât bâleŋânba oloŋ yekbei. Dâ bikŋe âmâ hain akbâen dâm aregât yeŋeak okot nâŋgâ aŋgim biwiyene damunŋe akmâ manbei. Hain akmâ âmâ biwinenŋe bâleŋande ewum gulipkowop dâm hamep akmâ hanokoakbei.

Anutugât kot yem âgâwiâp.

²⁴Galalupne, den bâiŋe hin makbe. Anutu kotŋe mem agatmâ makbe. Anutuŋe damunyeŋe akmâ tân yeŋguwiâp gârâmâ aregât yeukŋe bo manmâ yâkgât pagaleŋân dosa bâlâk akto herone olop katyekto aŋun bâlâk manmâ âgâwaigât kârikŋe yeandâp. ²⁵Anutu yâkŋe konok âmâ heŋgem nengumap aregât nenŋe Humonenŋe Yesu Kristogât akmâ kotŋe mem agatne. Yâk âmâ pagaleŋe damun akmap. Kotdâ Humo tâmbâ konok manmap. Akto kârikŋe wâtŋe hângeiŋe sop boân yeaneŋ hainâk yu yeandâp akto yeandâp âgâwiâp kârikŋe. A bundâk.